

國
朝
詞
綜
補

國朝詞綜補卷四十八

無錫丁紹儀杏船輯

慎毓林 一首

俞樾 七首

周星譽 十首

姚詩彥 一首

呂耀斗 八首

張熙 六首

張凱 一首

方德驥 一首

謝蘭生 三首

秦宗武 二首

秦宗瀚 二首

劉紹綱 一首

鄧輔綸 一首

鄧繹 一首

李曾裕 二首

黃錫禧 七首

姚正鏞 七首

許增 一首

孫福田 一首

慎毓林

字芙卿歸安人道光三十年進士官編修

疏影

綠陰

疏痕盪碧覆涼雲一角簷畔低羃蠟粉牆西霧繞烟縈
濃青飛上瑤席翠禽啼徹黃昏候剛送到嫩晴消息認
月痕篩滿冰紗殘夢那時難覓猶憶江南舊事玉闌
共凭處閒倚瓊笛簾幕沈沈庭院悄悄悄悄畫樓人寂
而今客裏春歸去怕重撚茜窗詞筆只寄情芳草天涯
一種斷魂顏色

俞

樾

字蔭甫德清人道光三十年進士官編修有春在堂詞

醉花陰

自鳴鐘

軋軋聲中昏又曉
暗運機關巧
簾幕寂無人
忽聽丁冬
幽夢驚回悄
金針鎮日水輪繞
旋轉何時了
莫道不
銷魂
聽取聲聲只是催人老

一翦梅

何處紅樓夜月明
樓上吹笙樓下搗箏
綺窗珠箔最瓏玲
人倚銀屏花映雕櫺
容易遊仙容易醒
夢斷瑤京
盼斷雲輶青衫燈下
百愁生
紅淚盈盈綠鬢星星

南鄉子

次女繡孫偕其壻附海舶入都倚此送之

送汝去長安九月西風乍戒寒
遼海雲帆何日到漫漫
綠水洋中翠袖單
幾夕暫盤桓
話久渾忘玉漏殘
欲向臨歧留後約
難難坐對黃花且盡歡

虞美人

西湖雨望

亂珠點點拋來疾
山氣濃於墨
眼前何處認南屏
但見空濛遠水接天青
蘭橈整日堤邊歇
誰更攜遊屐
烟簑雨笠坐孤蓬
只合紅衣畫箇老漁翁

天香

吸淡巴菰烟感口出之一一皆成圓圈亦閨中一枝也爲譜此詞

零玉連環碎珠絡
索清香幾縷
凝聚蓮舌挑圓櫻脣收
小春滿玉人嬌
輔玲瓏不斷早吐出
牟尼無數應勝香

焚寶鴨空成篆文回互
簾前絳紗密護怕團團被風
吹去萬種圓融全仗慧心吞吐看取闌干穩度又四角
垂垂化珠露散了冰輪氤氲再補

瑤華

十月十日與內子乘小舟泛西湖看月

風清月白如此良宵算人生能幾扁舟一葉雲水外搖
過湖心亭子櫓聲軋軋把鷗鷺聯翩驚起隔暮烟回望
紅窗認得讀書燈是天邊何處瓊樓歎一落紅塵光
景彈指今宵明月應笑我換了鬢青眉翠嫦娥休妬讓
我輩人閒遊戲倚綺窗共玩水輪約畧前生猶記

齊天樂

湖樓夜聞梟聲甚惡

小樓已是荒涼甚乖音又來孤枕鶴欵秋山鮎啼夜瀾
少有如伊淒緊初聽未審已銀燭光沈鐵簫聲噤獨倚
危闌玉樓寒粟起難禁哀鴻何太自苦想枯桑老禿
零落無甚賈傅工愁齊侯善疢被爾雄心消盡挑燈暗
哂笑賦鵬詞酸襍鴉人窘起撫龍泉怪鴟俄遠引

周星譽

字叔雲會稽人祥符籍道光三十年進士官廣東鹽道有東鷗草堂詞

浪淘沙

抄秋舟次五更枕上聞雨作

酒醒夜迢迢睡又無聊五更月暗雨如潮瘦盡黃花秋
不管儘著瀟瀟金鉏小羅幃紅燭孤燒黃昏庭院鎖
芭蕉還記那時聽不得何況今宵

秋千索

壬寅七月初十夜雨有憶

桃笙滑笏啼痕溼金井外幾聲秋蟀雨緊燈花墮瘦紅
記今夜剛初十 猩屏錦褥都非昔況又是影雙人隻
一院蕉陰似那時少了箇朦朧月

踏莎行

丙午春日卽事

珠幕閑垂銀屏慵展櫻桃斗帳金鳧暖綠楊池館閉春
陰卷簾人比東風嬾 眉葉青銷靨花紅斂纖腰打疊
游絲軟慙慙病過海棠時一春都被春愁管

虞美人

九月十六日夜泊雙橋去嘉興六十里

扁舟秋入嘉興路夢逐回波去斷腸名字說雙橋消受

單衾孤燭又今宵
松陰暗轉蓬窗靜
霜重溪風緊
亂蟲聲咽凍絲絲
剛是酒醒人睡月黃時

采桑子

舟夜襍憶

紅閨只恨蘭宵短
卸了殘妝倚暖迴廊月
在櫻桃樹底黃
可憐此夕篷窗宿
費盡思量挨徧淒涼
不信離家夜便長

西子妝

東陶琴子

濕翠黏衫涼紅暈燭秋在畫簾疎處
病懷已是怕黃昏
更禁他者宵風雨西窗人去
冷落了梧桐一樹鎮蕭蕭
向殘更訴我恁時情緒
愁無語閒畫鑪香寫就懷人

句高城只在雁聲中又冥冥墨雲遮住思君何許記十
里蘆花江路泥秋袞待把夢兒重作去聲

翠樓吟

秋夜對月有憶寄王嘯篁丁藍叔

鎖了重門碧梧疎處湘簾夜深猶捲露鴉棲定後只秋
與竹聲撩亂單衫小扇想花影吹笙那家庭院無人伴
冷清清地回廊兜轉 腸斷滿地焦陰靠紅闌幾摺和
誰同看蘇家潭上路正小曲幽坊月暗桂堂南畔問刻
襪香堦甚時重見無眠慣燈窗數盡銀河新雁

臺城路

上元後一夕兩次丹陽小病賦寄閨人

不多時候窗兒黑雨聲又催人起敲枕搜香背燈絮影

只是悶懨懨地怎生調理者小極心情薄寒天氣新舊
啼痕多應駢了舊鴛被料他雲母窗畔鎮低鬟促坐
簫局慵倚麝帕傳柑猩茸縛繭不似年時歡喜繡針停
未也多分深宵一般無睡悄招春纖把郵程暗計

摸魚兒

春晚坐寓圓桃花下寫懷

下湘簾綠濛濛處涼雲漸送春暝小桃紅煞斜陽裏閃
得蝶魂無定風又緊看碎糝胭脂繡出春愁影蠻紗香
靜恁負手尋花扶頭中酒又做去年病蘭閨畔也有
一株細錦橫枝正嵌窗鏡者時料已開成雪都與茜裙
爭靚離夢醒恐曲曲珠闌閑煞無人凭將愁和悶好寫

上銀箋倩他燕子寄箇斷腸信

金縷曲

孫杉麓同年慶咸下第將游汴中索畫梅一幅爲別并題其上

歡笑真無幾纔聽得流鶯聲老故人行矣一幅細枝揮
鴻寫多少酒邊深意也不分空山拋棄獨立自矜顏色
好怎春風輸與閑桃李襟上淚甚時洗人生榮落何
須計君看我鮎魚上竹冷官滋味藥省蘭臺何足羨薄
宦廿年而已但及早買田鄉里他日白頭湖上路好同
來結屋梅花底鷗鷺約倩花記

姚詩彥

字蓮舫番禺人道光三十年進士官編修有碧桐書屋詞

沁園春

題倪耘舫珠江春泛圖

乍展新圖頓觸離情猶春夢婆憶錢塘風月揚州簫鼓
金閨燈火袁浦笙歌湘晚帆檣秦淮樓榭歷歷尋思半
已訛從頭數倘相將比似畢竟如何而今爪印銷磨
算良夜輸君年少過羨靴紋篆碧平皴畫本匳光涵鏡
倒印吟窠小晏心情大蘇才調譜出雲林妙墨多還凝
想是衣香鬢影曾襲松螺

呂耀斗

字庭芝陽湖人道光三十年進士
官直隸候補道有

蝶戀花

蓬山只在傷春處不隔天涯但隔梨花雨多分日長無
意緒紅樓一角斜陽暮今日鞭絲慵再駐簾底分明

強道匆匆去擡眼畫橋楊柳樹年時拍扇兜香絮

虞美人

花西月墜涼燈白殘夢輕於翼一分秋已上眉頭不道
夢中還有幾分愁曉風窄地窺簾隙別恨桃笙識芭
蕉貪做一窗陰忘卻清霜葉葉碎秋心

醉花陰

藥鉋絲絲烟一暈攪得鑪香嫩移燭枕函邊六六屏山
著箇秋來影剗襪怯侵瑤砌冷銀箭捱更永者樣可
憐宵斗帳低垂人共鷓鴣醒

藕幕遮

試香茸商鈿葉怯怯心情未慣人憐惜學勸金尊無氣
力酒暈梨渦紅過春衫襖 笛聲寒釵語隔道是生疎
卻似曾相識小札瑤瑤何處覓待倩花梢雙燕殷勤說
減字木蘭花

明朝初七風雨可憐吹竟夕後會分明早已離愁一半
生 聲聲咽露秋在牽牛花上語莫怨今秋那見鴛鴦
會白頭

天仙子

睡起捲簾無意緒剗地東風春又去悵悵庭院沒人行
香半炷茶初煮細數落花閒過午 錦瑟橫塘腸斷路

依約夢痕無覓處春歸若肯到伊家花底語香邊句萬
一流鶯還記取

齊天樂

夜來孤館無眠慣雨聲更催天曙著戶簾開敲窗燭暗
儘意將愁來絮離情幾許祇枕淚衾薰自家將護招徧
蓮根暗中寫就斷腸句分明故鄉怨緒怎文園善病
誰分羈旅可憶年時空階點滴不似者番淒楚夢兒歸
去問畫尺聲中今宵寒否燕子簷花語儂燈畔語

滿江紅

曉枕啼鶯剛夢到謝家庭院聽水樣房櫳曲處鈿簫低

按簾幕語通香篆細秋千影隔東風軟正細桃花底教
鵲哥春愁淺 潘郎鬢年年換真珠字題都徧恁新詞
琢就相思難遣懷裏綠筠明滅淚奩中紅豆團團懣又
鯉魚風信到江南傳箋慣

張

熙

字子和會稽人
官江蘇知縣

玉漏遲

已酉十二月望日寒雨侵簾夜窗無月譜
此誌感

寂寥聽亂雨敲愁做冷撩人心緒殘響瀟瀟濃捲溼煙
如絮聽說梅花瘦了嘆林下無人來去誰共語燈昏小
閣夢流何處 倚徧十二闌干悵有約樓頭歡遊多阻
月到團團偏被白雲遮住悄數一年幾見只賸有今宵

三五天欲曙停琴幾回延伫

琵琶仙

春盡日舟中作

鶯老天涯怎荒卻故園春風消息空負流水年華扁舟
未歸客千萬樹濃陰暗接聽呼雨鷓鴣聲急古驛殘寒
昏燈殘夜愁思如織 悵別已多半飄零便雙燕都非
舊相識誰遣落花銷盡又青衫啼溼鄉夢遠深杯自語
怕玉筍苦勸離席但見橋月微茫四山空碧

徵招

東陽小泊適楊師山自雒皋來話亂後臨跡
相與悵惘旋復別去黯然成詞

眠鷗幾誤春潮信秋風暗吹萍聚倦柳不堪攀黯沙邊
涼雨見時驚鬢纓記攜手玉樓前度滿地戈鋌長干望

久夢寒砧杵 日暮故人來殘鴉外沈沈斷煙籠樹舉
酒話重陽把茱萸頻數夜長翻舊譜早腸斷寶箏移處
倚孤榜木落荒江問甚時歸去

疏影

秋夜泊瓜步有懷白下舊遊

歸鴻漫約數亂帆渺渺秋思寥廓故壘蒼涼落日旗飄
橫江一片離索傷心此日揚州路已換了綠楊城郭聽
晚來響徹悲笳又送幾聲殘柝 追念青山畫舸料難
尋夢裏煙雨樓閣百雉鸞環潮打西風木葉霜前先脫
邊愁早入芙蓉苑也不在黃昏秋角祇暮砧處處催寒
倦客傷心漂泊

又

盆梅作花根際苗菊一枝佳色嫣然孤芳不寂
寞矣感賦

竹籬茅舍臘秋容
半面如此瀟灑
又到黃昏高士山中
添箇淡人清話
天心似爲孤芳惜
把明月一輪斜挂憶
那時林下風清
定有珮環來也
同向簷前索笑倩他
孤鶴守疏影低亞
已近嚴冬便慣經霜
莫被西風吹謝
任放寄傲南窗裏
只不肯寄人籬下
問可容待到春來
無那昨宵寒乍

解連環

讀萍綠詞賦贈丁保庵

斷雲天未望
亭皋甚處暮愁空濶
正雁字清不勝寒對
喬木荒溝舊時明月
漫賦離憂早霜夜玉
龍吹徹記鐙

窗酒醒竹外一枝翠袖曾折 萸灣那回送別嘆華年
似羽輕付啼鵲任卷起十里珠簾曠涼碧搖烟亂蟲幽
咽彩筆題香鎮盼斷冶春時節待重來杜郎漸老暗添
鬢雪

張

凱

字次卿仁和
人官縣丞

蝶戀花

自題畫船聽雨圖

柔櫓一枝搖夢去夢也無情搖到天涯住記得畫船曾
艤處垂楊影碧閑飛絮 十五珠鬟歌翠縷各自銷魂
獨自聽愁雨啼老鶯聲春欲暮春光如客誰爲主

方德驥

字潛夫

摸魚子

題袁竹畦吳游詞草

俊詞場畫船簫鼓橫塘十里秋早煙波渺渺長洲苑想
見微雲衰草青未了有萬朵芙蓉一覽江天小朗吟正
好更暮雨真娘荒祠短簿撫景發長嘯尊前恨莫問
吳中舊稿拋來紅豆多少曉風殘月淮南路寂寞天涯
鴻爪歸夢杳怕記曲吳儂一例雙鬢老青衫料峭况滿
地兵戈殘年風雪何處寄懷抱

謝蘭生

字厚庵武進人
官浙江知縣

踏莎行

柳絮飄殘榆錢吹徧杜鵑啼老鶯喉變還餘幾處野花

紅綠陰門巷飛成片 好景無多餘寒猶戀新愁訴與
雙棲燕茶煙輕颺繡簾低游絲自裊空中線

蝶戀花

送孫楚江明府回山陰

魚雁頻番勞寄語失喜相逢爭抵相思苦蝶嬾鶯酣春
欲暮驪歌忽又催人去 大海萍踪何日聚一棹攜來
擬傍山陰住後夜知君回憶處錢塘江水西興樹

金縷曲

送祝子偉司馬奉差入都

嫋嫋西風起望長空夕陽疎柳秋痕滿地正好涼宵常
聚首更喜同舟相濟早催送一肩行李鞅掌風塵吾輩
分欲留君少住渾無計重握手短亭際 年來乞盡桃

花米間天涯悲歌擊筑更誰知已司馬青衫容易溼莫
向戍樓頻倚念此去二千餘里舊日金臺應好在恐高
陽酒侶今無幾言不盡黯然意

秦宗武

字梅生江甯人
官浙江知縣

祝英臺近

芳草

繞長亭圍古道癡蝶趁風舞一徑斜陽軟襯鈿車度可
憐南浦心傷西堂夢醒又勾起離人愁苦恨難訴爲
問兩鬢愁霜慙亂倩誰數怕近朱門絲惹碧桃妒年年
綠徧天涯多情如此怎迷卻王孫歸路

齊天樂

孫月坡丈云譚桐舫太守讀書山寺夜見
磷光徧野有一磷最大作紅色用千里鏡

照之見一人衣青衫持炬旋轉不定感而賦此

千年恨血歸何處成群被風吹斷彷彿漁燈依稀螢火
月黑林昏常現無窮幽怨是一點靈光未曾消滅鏡裏
窺來分明人影暗中見 茫茫塵世寄耳想夜臺無礙
不願輪轉莫是當初興亡戰地莫是故宮離苑游魂爲
變縱名士傾城也難分辨驀聽鐘聲一星星去遠

秦宗瀚

字韻江江甯人官

瑣窗寒

春雨

鳩逐聲聲今朝還又滴將春盡萋迷滿眼荒了裙腰一
徑誤良辰踏青俊遊暗占燈蕊晴難準間荒郊扶醉何

人尋得釵鈿花勝 那更相望冷怕紅樓遮斷縷裙眠
損臆情蕭瑟慣替燕愁鶯悶泣花房宵深未休無言看
共珠淚滾怪嫦娥也自拋人閉廣寒清影

洞仙歌

繪秋棠蝴蝶圖贈喻鶴仙校書

粉牆種徧甚相思清淚比似春花色還媚更伶俜孤蝶
瘦影偎香嘗盡否怨綠愁紅滋味 南園芳草路碎錦
成團昨夢迷離忍忘記畢竟太癡生身世西風還擔著
惜花心事幸一點春情未消磨倘仍化羅裙可能牢繫

劉紹綱

字雲圖侯官人官縣丞

眞珠簾

蝶魂

春愁黯黯晴兼雨，恣勾留。總在芳菲多處，深院悄無人。
只一天飛絮，不信東風吹不嬾。尙兀自遊情，栩栩休去。
閒剪紙，相招誰家庭宇。恰似倩女身輕，早朱闌繞遍。
依依芳樹，曉夢醒羅浮，更翩然來暮。不怕鶯捎和燕逐。
卻恐被游絲纏住。最苦是簾影沈沈，落花無主。

鄧輔綸

字彌之，武功人，官中書。

聲聲慢

芝田自南康來，述遭亂事。

嗚嗚遠角，瑟瑟涼飈，繁華轉眼消歇。鶴警烏啼，併作一
江寒咽。早時翠鈿金枕，賸零星亂燐殘葉。剛回首，看紛
紛飛濺。王孫襟血。是處愁堆夢疊。恁錦城重來，醉魂

先怯婁墓荒煙迷邵滕王蛺蝶傷心墜歡難覓怕聽他
從頭細說嘆劫恨到如今和夢喚徹

鄧

繹

字寶之武岡人諸生

百字令

送孫月坡之東安

荒雞啼罷聽嚴城畫鼓聲聲催出小聚萍踪天也妒良
會他時難必水國行吟山樓醉舞愁倚風前笛銷魂遠
道漸看秋鬢同白可憐浪跡天涯鷗閑鶴倦半是傷
心客老去詞名驚海內只合離群孤立冷炙辛酸青衫
落拓拚少人憐惜茫茫春感更逢離亂今日

李曾裕

字小瀛嘉定人官浙江同知有枝安山房詞

金縷曲

次辛稼軒韻題王叔彝詞稿

三影推張野譜新詞瓊裾玉佩衆仙來下想見添香紅
袖倚恰似小蠻初嫁把深淺眉痕偷畫供養江郎花管
豔更行空天矯如天馬一枝筆儘描寫 申江重結消
寒社趁良宵挑燈呼酒朗吟白也悵觸風煙江國夢無
復當年臺榭祇風月且談今夜行樂及時君記取笑人
生富貴何爲者舒醉眼小函夏

百字令

秋燕

斜陽門巷悵年年客裏易逢秋暮曾記來從初社日韶
景匆匆非故金粉樓臺秋千院落落葉絲如雨霜風漸

緊雁聲淒似鵲語 莫道翠幕香濃畫梁巢穩畢竟依
人住故主多情相護久留得紅絲一縷海角烏衣天涯
芳草流水華年度不如歸也夢回無限離緒

黃錫禧

字子鴻甘泉人官同知有棲雲山館詞

相見歡

風絲搖漾簾鉤動新愁記得夕陽人影共登樓 春夢
短更兒轉好揚州爭奈落花偏逐水東流

蝶戀花

畫蝴蝶花並賦

蝶樣花枝花樣蝶如蝶如花開趁芳菲節拾翠裙邊金
扇疊誤他拍碎花梢月 栩栩芳魂還自怯不怕鶯捎

只怕聽鶉鳩芳草有情隨步履南園人去成愁絕

玲瓏四犯

和李水署橫塘春雨曲

載酒畫橈飄鐙珠箔銷魂愁暗南浦綠波流恨遠怎遣
行人住天涯又吹斷絮甚而今落紅無主病裏相思新
來消瘦誰慰此情苦樓頭冷迷春雨有鳩聲喚曉添
倍酸楚一襟離別淚十里揚州路梨花夢斷前溪曲怎
不共閒雲來去聊寄語憑闌待將心事訴

聲聲慢

小秦淮清夢圖

鷗波打漿燕幕圍鐙那回曾艤扁舟杜牧飄零十年一
夢揚州消魂又聽玉笛唱伊涼幾度悲秋愁正遠記落

花時節相喚登樓 一點窺人眉月正煙籠楊柳不上
簾鉤寂寞闌干天寒翠袖香留腰支爲誰消瘦卸殘妝
無語凝眸深夜悄濺花枝清淚未收

雨霖鈴

秋夕不寐寂處寡歡背鐙孤吟不覺音之哀抑也

鳴蛩淒咽正綠窗外漏聲初歇西風竟夕難寐吹涼意
做悲秋時節悄立苔階夜久漸清露侵襪悵燕子飛去
梁空祇剩一簾舊時月 而今潘鬢生華髮更那堪幾
樹飄殘葉思量者番成夢沈水燼一燈明滅是處天涯
又聽征鴻驀地啼徹鎮萬里渺渺雲羅獨自成愁絕

憶舊游

過舊游地

甚一灣流水滿地梨花深掩重門十二闌干悄記中宵
風露細數星辰斷腸隔年心事芳草怨王孫問燕子飛
來故巢何處香冷歌塵 尋春漫回首看幾疊雲山一
抹荒村誰種溪邊柳認風前絮影吹過啼痕忘卻舊時
歸路煙雨近黃昏料載得離愁相思此去縈夢魂

姚正鏞

字仲海蓋平人官刑部
郎中有江上維舟詞

琵琶仙

室冷於冰鐙昏似漆暗風疎雨觸處驚秋
惟羈旅客得此滋味於愁中耳

新雁來時早勾起秋雨秋風消息幾樹黃葉無情催歸
誤羈客怕繞砌疎花亂落空狼籍滿庭寒色策策輕陰
沈沈斷漏驚破幽寂 夜闌更挑盡殘鐙有酸雨聲聲

傍愁滴已拚去飄零雙鬢把霜華堆積休更倚湘簾捲
處鎮一桁晚翠猶溼只有纖月微明暗籠空碧

霓裳中序第一

同硯山吳陵城西看木芙蓉作

微颿蕩靜碧惻惻昏鴉寒落日羈旅亂愁似織正疎柳
墮黃殘蘆縈白經秋暗憶有一枝開向幽夕繁華盡西
風影裏憔悴見顏色拋擲玉容誰惜漾波底嬌紅凝
滴蕭條留伴蓓莢亂落清煙不傍阡陌拒霜甘寂寂問
別怨何人識得應憐我拏來木末冷露淚同溼

霜葉飛

黃葉

千林如繡芳菲晚關河霜信初透暗風吹到雁來時誰

鬪鵝兒酒便釀出深秋氣候哀蟬聲斷蕭條後有古寺
荒寒鎮冷落六朝金粉此際孤負 不見昔日青青一
雙蝴蝶只合相對消瘦淡煙疎雨總無情恰菊籬開又
算望眼都迷橘柚江南邨遠傷心久更盼他春韶換吹
暖天涯綠陰依舊

淡黃柳

題黃琴川南灘春柳圖

去年柳色門外花如雪又是清明寒食節望望紅樓夢
隔愁說腰肢二三月 正凝絕青衫易華髮翠眉歛對
離別怕江南草長鶯啼歇杜牧多情再來何似底事倡
條待折

掃花游

春陰

荼蘼放了，怎嫩柳絲長繫春難住。愁懷正苦甚清陰作
意攪成花霧。立盡黃昏怕被珠簾捲去。畫闌撫有隔葉
晚鶯啼絕芳樹。淡淡和煙，洹向院宇輕籠暗催春暮。
惜春夢杳任東風一霎落紅無數。底事關情點點傷心
細雨。倍淒楚。又銀屏漏聲如訴。

許

增

字益齋仁和人官安
徽知縣有榆園詞

百字令

春雲如墨早春愁如夢。織成絲雨樓閣愔愔簾翠地不
耐春來又去。陌上花飛尊前酒冷惆悵人何處。香銷夢

醒者番真箇虛度 便教劇盡情苗漫天飛絮又被風
吹聚鎮日瞢騰天不管天也有情沒緒拍徧紅牙刻殘
樺燭總是傷心句匆匆去矣楝花飛起無據

孫福田

字逸農山陰人
官廣東通判

賣花聲

倪耘劬夜泛珠江繪圖索題率爾倚此

莫負好良宵酒舫燈檣詩魂都爲美人銷除卻雲林書
畫筆夢也難描 花落漱珠橋殘月空招舊時遊處未
生潮惆悵曉風楊柳岸劫火纔燒

國朝詞綜補卷四十八

國朝詞綜補卷四十九

無錫丁紹儀杏舲輯

楊希閔 三首

蘊璘 一首

徐同甫 一首

唐堦 十二首

蔣春霖 二十首

丁至和 十三首

馬書城 二首

孫森 二首

查承源 一首

楊晉藩 四首

楊希閔

字鐵傅號卧雲江西新城人貢生官中書有痛飲詞

好事近

舟次邵武大乾謁隋守歐陽公祠墓公名
補官溫陵守任滿歸值隋亡恥事二姓全
家沉於大乾里人為葬山之陽立祠祀之
祈夢奇應事見邵武府志

嵐氣溼衣衫山鎖一灣寒碧中瘞隋朝忠骨薦牲馨盈
百墳前翁仲已頽唐靈爽尙憑式欲就篷窗高卧奈
灘聲鳴咽

江南好 登邵武熙春山

登樓望斜照隔鄉關疏樹澹煙籠雉堞晚鐘清磬接鰲
山飛鳥幾行還

蝶戀花

郭次峰信來感懷卻寄

老天劫運何從說到得無家還作無家別近築愁城堅
似鐵慙慙又是清明節竄身窮海雙趺裂透骨淒涼
十倍餐風雪讀盡絃詩清興絕止餘血漉胸前熱

蘊

璘

字小泉長白人官廣東同知有采菽堂詞

唐多令

夜泛珠江

一望碧迢迢珠江泛畫橈倚篷窗靜聽吹簫曲罷潮平
竹已半才過了漱珠橋塵夢恨難消新愁酒莫澆向
東風訴盡無聊惆悵白鵝潭畔月依舊是可憐宵

徐同甫

字竹君漢軍正黃旗人官通判有小南海詞

金縷曲

倪耘劬新築野水閒鷗館賦此奉贈

散誕今如此溯遺芬圖書奇古雲林清閼綠野平原非
易得一壑一邱足矣更說甚風標公子人世雞蟲紛得
失見沙鷗放曠心先喜難得是耆池水年時浩蕩經

千里趁斜陽。柳橋花塢幾番遊戲。湯沐空明。三兩頃。乍試蕤鄉風味。愛倒影。峰巒蒼翠。星斗高寒。呼舊侶。話萍蹤。歷歷烟波裏。湖海氣。屏除未

唐

璫字益庵秀水人諸生官富陽訓導有竹西小築詞

謁金門

蛩語悄。秋意被他偷報。碧瀉銀河流到曉。牽牛花放了。一徑梧陰誰掃。月底玉簫聲杳。簾捲西風人暗老。怕將鸞鏡照

柳梢青

夢向春甜。春來偏困。瘦上眉尖。嬾整犀釵。羞臨鸞鏡。怕

捲蝦簾 幾番曲度紅鹽人去也相思轉添是恨綿綿
是愁脈脈是病懨懨

鵲橋仙

鶯啼人倦鵲啼人怨春老幾家庭院惜花枉自囑東風
早飛卻殘紅一半 天涯何遠流光易換漫把水晶簾
捲隔牆倩影送秋千應不解愁長愁短

蝶戀花

舟行卽事

一葉舸輕柔艣短翦破萍紋百摺春羅軟幾片落紅飛
斷岸雙雙綠鴨銜來遠 曉日微烘風力緩不信浮槎
穩可通銀漢夢壓鴛衾猶未轉玉驄嘶向誰家院

魚家傲

題汪君菊莊鶴湖偕隱圖

湖水蒼茫湖月小雪點蘆花時有歌聲繞草笠秧蓑端
正了扁舟好煙波學泛鴟夷棹醉後投竿還自笑驚
醒鴛鴦隣舫無人覺愁水愁風都不曉將誰較一雙白
鷺拳沙島

淒涼犯

祝菊門孝廉前游楚南繪蕭湘聽雨圖丁亥秋重來星沙囑賦此闌

夢回篷底連宵雨聲聲都帶秋意荒洲斷浦鷗寒鷺冷
客游倦矣飄蕭未已問灑徧黃蘆叢未怕湘娥千秋幽
恨驀地又勾起遙指峰青處爪印泥痕而今猶記生
綃重展認依稀層巒如洗一抹煙痕把多少離魂牢繫

憶年時點點似和斷雁唳

石湖仙

二十年不到西湖薄游志感

湖天春曉盪一片琉璃鷗影如導指點段家橋熨眉頭
四圍翠繞黃姑塔小乍扶起雙峰斜照重到怕流鶯與
我俱老 回頭試尋泡幻似天吳幾番顛倒短鬢霜添
纔向鰲磯垂釣松徑釵橫柳隄線裊迎人微笑扁舟好
攜樽且泛煙棹

玲瓏玉

臺陽籬落間半植草樹有名綠珊瑚者不
花無葉而枝幹蔥翠可喜亦海外異卉也

鐵網兜來疏籬外翠影莎籠煙消七尺賽他火齊殷紅
遮斷蘆簾紙閣怕龍鬚誤竹虬爪疑松青蔥倩瓊釵簪

向鬢蓬 細認毘耶別種稱徐陵架筆越樣玲瓏試折
纖柯配詩人瘦削游筇何須綴枝密朶早覩徧苔階涼
月展印弓弓渾不見綠衣娘飛上淺茸

迷神引

清霜慘瓦催寒急聲遞誰家橫笛風吹羅幙閃銀燈滅
夜初長人何處暗悲噎記得梅花開遲夜月記得柳花
飛碾晴雪 秋上心頭愁過秋時節便到愁來和誰說
雙鬢刁騷早融盡肝腸鐵帳年時紅牆近蓬山隔睡也
數更更焦柝擊醒也聽聲聲虬漏咽

沁園春 影

一樹瓊花忽現雙身神情儼然訝疏籬映處瘦爭黃菊
方塘照澈豔奪緋蓮背後疑無眼中又有比似真真態
更妍休猜道是白描高手畫出嬋娟 聯翩珠樹根連
任來往相隨莫棄捐儘開奩寶月看成捉搦隔牆斜景
颺過鞦韆翠袖難扶冰絃同抱忒煞婆娑見也憐閒階
立惹金鈴犬誤吠向花前

又聲

一串珠圓遞出纖喉天然脆清想闌前傳語絮同新燕
花間度曲輕擬雛鶯吟罷徐收笑來還忍羅帕微遮半
顰櫻調禽舌喜喃喃學話有箇嬌鸚 多情巧度銀屏

縱隔著紅牆聽得明正水晶簾下悄呼婢到流蘇帳底
偷喚耶醒半晌喁喁幾番嚶嚶銷盡柔魂總爲卿良宵
近更香屑微散低按瑤笙

摸魚兒

白下高竹坡以明月滿船歸去好美人親
手炙鱸魚句意繪圖囑題率成此解

算年來搖煙盪月狎鷗生計差近半規蟾魄湖心浸端
正一奩明鏡卿試問間秋老蓴肥何不攜歸艇襟塵澣
淨羨軟翦韉紋低勻黛翠重把莫愁認 舵樓底好是
不愁孤另纖纖微露眉靚宵深穩抱鴛鴦宿篷背稍移
花影君且聽聽珠樣纖喉唱到風波定別饒清興看暖
炙銀鱸滿浮綠蟻此樂更誰省

蔣春霖

字鹿潭江陰人順天籍官兩淮鹽大使有水雲樓詞

蕃女怨

美人樓上眠未起樓下春水碧魚鱗紅燕尾夢魂千里
去年楊柳已天涯況楊花

迴方怨

芹葉亂棗花零送客江南畫船無風春水輕斷腸何處
踏歌聲澹烟斜日裏閉孤城

酒泉子

落日放船風定晚烟沈樹荻蘆秋鴻雁去大江寒白
波千里江蘼長歸夢野雲來去暮山多潮信爽寄書難

一絡索

江村夜泊懷丁保齋

村外柳煙深鎖晚寒驚破強沽殘酒
熨春愁已節侯梨花過望盡隔江
星火擁衾猶坐斷鐘隱隱欲霜天
問可有詩魂墮

南鄉子

寒意賸春纖放燕歸來又下簾
蝴蝶漸稀人漸嬾厭厭滿地青榆
午夢甜淡日隱重簷雨氣雲痕百
態兼睡起卻驚天影暗眉尖愁似
春陰向晚添

踏莎行

癸丑三月賦

疊砌苔深遮窗松疊無人小院纖
塵隔斜陽雙燕欲歸

來捲簾錯放楊花入 蝶怨香遲鶯嫌語澀老紅吹盡
春無力東風一夜轉平蕪可憐愁滿江南北

虞美人

水晶簾捲濃霧夜靜涼生樹病來身似瘦梧桐覺道
一枝一葉怕秋風 銀潢何日鎬兵氣劍指寒星碎遙
憑南斗望京華忘卻滿身清露在天涯

又 金陵失秦淮女子高蕊陷賊中數月今春見於東
淘愁蛾蓬鬢不似舊時矣

風前忽墮驚飛雁鬢影春雲亂而今翻說羨楊花縱使
飄零猶不到天涯 琵琶聲咽玲瓏玉愁損歌眉綠酒
邊休唱念家山還是兵戈滿眼路漫漫

水龍吟

癸丑除夕

一年似夢光陰忽忽戰鼓聲中過舊愁纔翦新愁又起
傷心還我凍雨連山江烽照晚歸思無那任春盤堆玉
邀人臘酒渾不耐通宵坐還記敲冰官舸鬧蛾兒揚
州燈火舊嬉遊處而今何在城闔空鎖小市春聲深門
笑語不聽猶可怕天涯憶著梅花有淚向東風墮

瑣窗寒

歲聿云暮舟行苦寒擁衾酌酒感吟成調

枯樹圍鴉荒蘆聚鴨淡陰催暝雲垂貼水波暗更無星
影湧平沙寒潮夜生布帆一霎江風勁正嘹空斷雁趁
船斜去酒邊愁聽重省歡遊境記借舫移花試泉分

茗西州再過可奈鷗鄉人醒掩霜蓬殘燈自挑半牀翠
被支峭冷任愁窗夢繞疏蘋隔浦尋煙艇

憶舊遊

記倚窗窺笑接坐薰香扇角初逢門掩琵琶靜又驚枝
暗起人似春鴻峭寒幾番侵袂眉翠淡芙蓉歎絮語衾
邊淚痕蠹底同訴飄蓬 匆匆最無賴是種得垂楊偏
繫歸驄別恨絲鞭阻指一林殘葉瘦馬西風夢醒半規
蛾月依舊印簾櫳怕數徧幽期燈花尙說今夜紅

霓裳中序第一

春事欲闌故人江外旅窗竟夕索
夢不得書寄何梅屋

蒼苔換舊跡過卻清明春是客花外玉尊又側任庭樹

國朝詩集卷之四
斂陰風簾催夕天涯倦翼趁墜紅飛去無力淒涼久一
燈夢覺隱約夜窗白簷隙峭寒猶積歎瘦骨輕衾怎
敵相思偏在故國竹檻鼓琴水榭題壁斷鴻歸太急便
忘卻江南舊識鄉程遠何時孤棹卧聽倚樓笛

揚州慢

兵後金眉生還居揚州賦詩索和

亂草埋沙孤城照水倦游重見淒涼近東園巷陌但一
片斜陽占蘿徑幽人自喜暮雅啼處猶有垂楊奈新栽
紅藥開時偏斷人腸竹邊舊屋問歸來燕子都忘漫
指點烟蕪梅花塚在文選樓荒一覺十年前夢春風滅
杜牧清狂又簫聲吹起疏簾殘月微茫

角招

送宗湘文入都卽之官杭州

勸君去傷心海上孤琴又緩君住隋帆催晚渡更酌酒
盃燈下深語青春鬢縷莫厭染京華塵土十載江鄉烽
火到樓閣五雲中憶哀鴻音苦應許橋題秀句花圍
錦帶繫馬揚州路故人還寄旅待與重攀津亭秋樹西
冷夢阻更不比春波南浦後日相思甚處怕零落石磯
邊閒鷗鷺

琵琶仙

五湖之志苦不得遂歲乙丑偕婉君泛舟
黃橋望見烟水益思鄉土譜此志慨

天際歸舟悔輕與故國梅花爲約歸雁啼入筓篴沙洲
共飄泊寒未減東風又急問誰管沈腰愁削一舸青琴

乘濤載雪聊共斟酌 更休怨傷別傷春怕垂老心期
更非昨彈指十年幽恨損蕭娘眉萼今夜冷蓬窗嬾倚
爲明月強起梳掠怎奈銀甲秋聲暗回清角

青房並蒂蓮

送別宗載之

盼烟堤又春歸露草愁長江離絮語津亭老去重分攜
玉箏絃外吟髭白記挑燈同翦新詞伴翠尊未了高談
照花微月轉窗西 明朝布帆去遠聽夾岸垂楊處處
鶯啼也應憶菰鄉舊侶醉隱漁磯江上幾番夜雨怕春
恨還染薜蘿衣正倚闌卻遇飛鴻澹烟斜日晚淒迷

玉蝴蝶

和金眉生歸鳳曲用吳夢窗韻

水面乍開妝鏡弄波風起驚墮疎蟬翠楫香空畫眉聲
咽江邊怨歌長階搖心苦攀折誤叱利威寒憶前臘絳
綃緘語紅淚闌干愁端憑誰代理檻移病藥錦護雙
蓮因甚瓊簫不招彩鳳還樓前溼青衫自題秋恨憐翠
袖猶殿春暄夢如烟數峯青斷涼月娟娟

瑤華

敗荷

青房乍結夢醒江南又雨聲敲碎羅衣葉葉寒未剪斷
壓一湖深翠月明歌斷更誰倚畫船閒醉賸數叢敗葦
荒蘆合寫橫塘秋思飄零漫惜青衫算舞散湘皋都
是憔悴鴛鴦自浴竟不管悄換西風塵世淒涼太液莫

暗滴露盤清淚待幾時重展枯香斜日小橋漁市

八聲甘州

余少識劉梅史於武昌不見且二十年辛亥秋自吳來淮翦燈話舊賦此以贈

怪西風偏聚斷腸人相逢又天涯似晴空墮葉偶隨寒
雁吹集平沙塵世幾番蕉鹿春夢冷窗紗一夜巴山雨
雙鬢都華笑指江邊黃鶴問樓頭明月今爲誰斜共
飄零千里燕子尙無家且休賣珊瑚寶玦看青衫寫恨
入琵琶同懷感把悲秋淚彈上蘆花

月下笛

院落乍秋亂蛩絮壁賦寄月樓

淺樹留雲疎花倚石小亭秋聚風泉暗語夜深琴韻愁
譜芭蕉葉碎桐陰減料不礙空階細雨奈牋紋疊雪簞

牀橫玉舊情無數 休賦歸來句待采徧芙蓉隔江煙
露吹簫俊侶跨鸞今在何許相思淚滴珊瑚枕尙夢到
穿針院字只後夜酒醒時滿地鳴蛩自語

丁至和

字葆庵大興人官兩淮鹽大使有萍綠詞

柳梢青

孤雁

何處呼羣寒雲萬疊欲下仍停可似春前玉關皓月夢
不分明 含情未寄哀鳴恐雙宿鴛鴦儔厭聽又怕長門
霜清巷永還抱秦箏

踏莎行

早秋懷書

蘭澤新梳蛾心淺鬢秋腰弱不勝羅綺闌干一碧繡簾

垂有人正在猩屏底 賦藥芳懷采萍幽思問誰省識
冬郎意龍鬚八尺展風漪已涼天氣禁寒未

鷓鴣天

前與張子和飲於得月軒極一時觴詠之
樂今子和下世余復來此見牆角秋海棠
一叢娟楚可憐簾捲西風幾與黃花同瘦
撫今憶昔不禁惻然

冷雨闌干貼翠鈿相思如夢化空烟珊珊倩女嬌無那
楚楚秋娘瘦可憐 金屋豔玉堂仙不須梳洗亦嬋娟
冰綃慣是啼痕染腸斷西風又一年

月下笛

清明

開盡桐華天涯換了綠陰芳樹清游倦否好山依舊眉
嫵鈿車望斷垂楊外況更聽江南夜雨恨十年夢影飄

銚珠箔竟成幽阻 前度前裙處賸貼鏡文漪撲衫香
絮塵侵翠譜謝孃今在何許梨雲滿地秋千散任接葉
巢鶯自語倩誰去爲通辭還把春愁寄與

水龍吟

扁舟載酒訪淮山舊園亂苔滿徑人事全
非撫景興懷醉吟成調

落華吹滿空林溼陰慣向瑤闌聚閒庭半掩薜蘿無怨老
海棠期誤幾日歌停珠塵暗蝕一階涼露記遺鈿去後
瓊鉤印淺還偷認尋春處 休指櫻桃門戶最淒迷荷
薰槐暑荒碑片石青山破寺夕陽無語香淚拋紅芳魂
濺碧絮蟲尤苦倩淮流夜月鷗波千里帶春愁去

瑤華

自題十三樓吹笛圖

芳雲墜絮夢雨飄茵又東風寒食孤吟情味唯記取小
夜銀缸能識相思怕種奈流水都成愁碧便玉人喚起
梅邊不似舊時消息 催人杜宇聲聲嘆我已無家休
問歸日詞腸一寸算總是清淚零星搓得棲鴉眉柳梢
畫出傷心顏色最可憐却後鶯華漫把酒杯空擲

憶舊游

與馬竹漁夜話湖上舊游

記吟衫拂絮畫漿衝烟買醉虹橋唾綠湖波膩蕩香塵
十里華霧迢迢沸雲豔歌金縷飛度一枝簫看夕照平
山樓臺倒影鶯語都嬌 蕭條對流水想杜牧重來冶
思難消臥柳隄陰老問眉痕深淺今爲誰描翠艫甚時

同扣明月送歸潮但寄語盟鷗空城斷角吹麗譙

宴清都

平山堂懷古

手種堂前柳細屏展翠陰搖曳清晝嵐雲拂檻萍香度
水一鷗飛瘦幽懷說向湖天待付與紅衣勸酒但怪得
霧鎖虛窗眉橫淺黛長皺憑高怕見斜陽飄零絮點
吹滿塵袖尋芳背錦留春載榼石泉聽久烟華又消殘
劫賸練影浮空依舊問那回語罷疏鐘倦鴉記否

八歸

送胡研華歸杭

鳬波帶藻鶯隄飛絮春事又苦漸歇簫聲一路西泠去
曾是綠藤紅藕豔歌香接昨夜河豚吹暎浪聽舵尾銀

三
三
舳催發正隱約雨霽南屏涇磬度林樾 休嘆風流頓
減長汀疏柳尙有閒鷗能說玉窗烟鎖畫闌人悄滿地
荼蘼如雪但凭肩對酒大好湖山付華月高樓外暮鴉
殘照望極孤帆江雲千萬疊

驀山溪

昔游門巷風景全殊偶觸離懷述爲此解

可人如玉鏡裏修蛾綠待月笑憑肩正庭樹櫻桃乍熟
碧油帷底私語訴分明香裊裊晚涼初剗韞宜新浴
秋風雨槩盪破清溪曲譜字怕重翻嘆漂泊幽懽未足
石牀流水唯有雁悽飛閒撥葉過西廊打棗聽鄰屋

秋宵吟

嬾調冰罷雪滿樹影斜移窗牖頗惆悵爲換了羅衫嫩
涼呼酒 水萍疏燕去後俊約無端孤負西風緊漫瘦
損當時玉腰纖柳 夢繞瑤闌記笑執華前素手墜懼
如絮暗綠成陰往事怕回首籬菊霜華有過卻初三還
待下九念空房漏點淒清留得明月照睡久

玉燭新

王梅

山容愁黛斂悵贈遠天寒暮扉深掩素裳照水輕妝好
漫比近時勻染唐昌夢裏許那日偷窺酥臉因嘆息搖
曳綃帶銀鸞夜歸孤嶼 尋春恨我來遲看悄倚琅玕
一枝吹澹玉簫萬感橫斜影畫冷黃昏卹店霽九翠蘸

早淚粉沾衣千點還自喜東閣何郎風流未減

聲聲慢

酒醒香消舊游如夢風清月白涼夜何其譜此東王紫萼杭州

霜痕浸瓦月色催更迢迢換盡華年只是當時無端重
惜輕憐羈愁未須共說賺清狂人似鷗閒偏溯遠看荒
橋野水雁影都寒誰喚芳園歌舞對西風一笑重與
憑闌杜老而今醉懷消遣應難滄江暗驚歲晚又梅華
春動孤山思正永引詩心香滿畫船

馬書成

字竹漁介休人官江蘇

月下笛

與丁保璽話舊有感

誰喚詞僊十年一夢傷心時候新腔石帚記曾梅下攜

手湖山依約登臨過
思往事不堪回首問揚州
明月瓊簫何處玉人知否
垂柳還依舊看畫檻珠簾白鷗飛
瘦春波自皺釀成春思如酒
天涯已恨雙蓬鬢
更夜雨江南聽久倚闌畔
令人愁清角黃昏又奏

金縷曲

機聲

軋軋知何處想春纖往回穿擲暗含淒苦
寸寸相思牽不斷好託迴文細訴
聽韻雜簷鈴遙度幾度拋梭
渾未肯怕西風吹徹寒無絮
鄰壁外又敲雨井闌絡緯鳴
將曙最關心天涯夢冷征衣到否
樓角鐙青憐夜永那有春鶯對語
卻一遞一絲一縷縷縷都傳哀怨
意似柔

腸宛轉尋端緒還付與暮砧去

孫森

字凱卿仁和人官兩淮鹽經歷

惜奴嬌

春雨積日好友不來病中頗懷尤園譜此自遣

病欲爭春甚尙阻幽尋興春須笑無人解領爲約溪梅
可能耐疏香等愁損幾番風欺花釀冷暝入西窗盼
霽色何時準誰念我宵寒自忍謝屐都稀嘆瘦到蒼苔
印休聽曉煙外鳩啼正緊

湘月

題高茶庵空江弔影圖圖爲其夫人殉難錢江作

驚心波逝嘆茫茫眼底身世如許尙覓歡踪奈潮水那
識孤懷酸楚月意荒涼山容黯淡不是眞眉嬾行雲安

在斷腸爭忍回顧 嗟念我亦飄流一襟離恨儘而今
分取空悵珠沈問怨曲招得幽魂歸否落日平沙寒煙
野草獨自和誰語更休凝望舊家惟見塵霧

查承源

字子山海甯人
官江蘇府經歷

壽樓春

張君嘯峰繪藕花香裏填詞圖自倚此調
索和依韻奉題

攀芙蓉秋芳有淞簾凝翠湘簟招涼消受花天四面畫
船中央峰泖景離愁長憶舊時江南明璫寄綠意紅情
蓮憐蕙憶翻譜按新腔 蘅蕪感催年光悵微波藕襪
零露蓬房祇惜風流張緒鬢絲飄霜應笑我留江鄉念
故家湖名鴛鴦便唱徧田田吳宮采香空斷腸

楊晉藩

字蕉隱陽湖人官浙江知縣有蕉林書屋詞

蝶戀花

題金左泉春風憶舊圖

明月傳情花解語半掩朱扉人在花深處轉眼繁華容
易暮落紅滿地春無主水淺蓬萊今幾度苔印香塵
猶憶年時路舊徑重尋疑已誤斜陽燕子空來去

風入松

綠陰門巷長苔錢夢到夕陽邊惜春莫放春歸去頻攜
酒且醉花前舊是誰家院落彩旛不繫鞦韆幾回共
泛白鷗天愁壓畫船偏一鞭重到西泠路空惆悵蔓草
荒烟賸有湖山無恙年年尙駐香鉤

綠蓋舞風輕

秋荷

玉露下寒塘。翠袖盈盈斜陽冷。南浦空外幽香。看一枝
素豔倚鑑。徐吐淺蘊。啼痕想芳緒。應傷遲暮。恨天涯遠
阻秋期。孤負仙侶。記取轉眼飄零。水珮風裳零亂
無數。月曉霜清。步淩波夢向碧雲深處。寄與湘君休更
怨惜。花無主。最淒涼。籬角又添蛩語。

春從天上來

秋杪梨雲館古梨復花以詞酬之

跡類秋萍。笑囊琴匣劒滄海。曾經故里歸棹。香冷雲屏
一番景物。淒清念花時有幾。悵遠隔孤負芳情。料天公
似相憐。羈羽特喚春醒。窗外數枝乍吐。誤燕子歸來。

猶認簾旌寂寞池臺深沈院落賸有瘦蝶殘螢展西風
斜照雕闌外倚覺輕盈對閒庭正一痕涼月幾處蟲聲

國朝詞綜補卷四十九

國朝詞綜補卷五十

無錫丁紹儀杏舫輯

蔣兆棠 一首

張鴻卓 十三首

張文虎 二首

杜文瀾 八首

潘曾瑋 五首
補詞

俞敦培 六首
補詞

王慶勳 五首
補詞

王慶昌 一首

周作鎔 三首

繼振 八首
補詞

王安瀾 一首

沈起潤 一首

余鏐 一首

陳詠 一首

孫兆善 一首

丁翼 五首

蔣兆棠

字雲笙元和人
諸生官訓導

隔溪梅令

奉題張嘯峰學博藕花香裏填詞圖

風流三影擅詞場按宮商譜得采蓮新曲付吳娘花光
人影香藕花世界柳絲鄉水中央我欲從君高唱買
陂塘五湖移釣艫

張鴻卓

字偉甫號嘯峰江蘇華亭人
諸生官訓導有綠雪館詞

菩薩蠻

題水榭調箏士女圖

柳陰一碧濃無縫藕花涼入鴛鴦夢池館雨晴初煙痕
瘦欲無闌干環赤玉鬢影臨波綠獨自理銀箏聲隨
雲水清

清平樂

竹風響玉雨過天如沐一箇涼蟬時斷續滿地槐陰鋪
綠石闌斜傍芳池田田低映漣漪試問閒中清課藕
花香裏填詞

蝶戀花

暮春次汪今韓奏雲韻

重訪赤闌橋畔路冷落亭臺舊是銷魂處兩箇黃鸝枝
上語綠陰一徑飄香絮鎮日瞢騰無意緒一寸迴腸
攪碎愁千縷人自傷春春自去東風如夢吹紅雨

解連環

用美成韻

錦箋難託悵孤鴻甚處楚天綿邈記玉階學拜新蟾悄

顧影花前露涼衣薄困倚簾櫳任閒愁千紅索自東
風夢斷一寸相思欲療無藥殘香漸消蕙若料連環
爪跡猶在闌角憶舊事空對鐙花算鏡卜釵盟總教辜
卻只恐重來綠陰滿難尋紅萼正銷魂笛聲弄晚玉梅
又落

淒涼犯

泊舟荒江彌目秋色晚風淒緊殊難爲懷
度白石老仙自製曲一章扣舷歌之

作成暮景長隄外晴嵐澹到無影朔風起也蕭蕭瑟瑟
半江楓冷遙天入鏡渺千里秋痕碧淨繞荒祠殘鴉數
點橋外繫孤艇回首南塘路冷落征鴻旅懷誰省碧
波一片但溶溶蕩愁不定一晌沈吟又斜照紅過樹頂

漸迷濛斷靄一縷渡口暝

鵲橋仙

秋夜不寐枕上作

風聲漸緩雨聲漸密料峭輕寒陣陣二更二點又將停
鐙一瑣碧窗紅暈 丁丁簷鐵騷騷庭樹催動一襟幽
恨被他轉輾夢難成便夢也了無憑準

摸魚兒

題書巢兄垂釣圖

渺澄波碧琉璃滑晴江十里如此柳陰深處攜竿坐涼
胃滿身空翠風細細裊一縷綸絲不定斜陽裏高蹤且
寄算魚有魚無更何須問吾自寫吾意 江鄉好最好
西風乍起金蘂玉膾洵美天涯是處多風浪何似五茸

煙水論夙志肯獨讓鳬翁閒領江湖味塵襟盡洗笑若
問頭銜煙波事業合署釣徒耳

高陽臺

百年老屋燬於兵燹僅砌角菊花一叢於廢瓦中淩霜獨燦猶憶是數年前亡孫聲遠植以娛老人者花尙依依心彌惻惻因述此解不禁泣然

壞瓦苔攢頽垣蔓絡可堪舊日房櫳劫後重來淒迷一
片西風團團骨肉今餘幾最傷心堂北萱空況西東子
舍階墀半掩蒿蓬 禁寒牘有荒庭菊尙鐵撐傲骨錦
綢秋容記得童孫那時手植娛翁蘭摧無復重生望更
何堪雪樣霜濃便留教晚節長榮怕說前蹤

齊天樂

水西門訪張麗華墓

紅梁已斷雞臺夢春風尙留香土闌檻虹圍沈檀霧起
斷送秣陵煙雨黃奴自誤只草草降幡竟辭國去玉樹
飄零等閒猶唱隔江女青溪流水自咽便銜精衛石
離恨難補破鏡塵封壞裙蝶化開遍野花無主瓊魂謾
苦賸紅冷銀牀未消脂沲轉眼興亡玉鈎斜畔路

水龍吟

吳歌

一篙軟浪吳淞船唇月淡三更近風前四起貫如珠串
高低不定萬籟蕭然一絲獨裊江空天迴記楓橋夜半
征帆乍卸懷人夢頻催醒木落橫塘煙冷一聲聲動
人幽興採蓮越女鶯喉清脆差堪相並蟹舍燈青蘋洲

露白老魚出聽怎知人別自偷拈紅豆把新聲訂

清平樂

秋江舟夜集句

離腸宛轉

元好問

繡被堆香暖

蔡伸

月落沙平江似練

張炎回

首高城天遠

張堃

亂山千疊無情

陳亮

夢回愁對三更

劉秉

中繫我扁舟且住

戴復古

渡頭楊柳青青

晏幾道

蝶戀花

秋夜集句

殘酒欲醒中夜起

馮延巳

銀漢無聲

汪暉

露滴寒如水

盧氏獨

倚危樓風細細

柳永

那堪玉漏長如歲

蘇軾

紅燭自憐無

好計

晏幾道

羅幙輕寒

晏殊

點點殘花墜

歐陽修

舊夢蒼茫雲

海際

詹正

無言劃盡屏山翠

毛滂

張文虎

字嘯山南
滙人諸生

八聲甘州

展芳筵重憶十年前春鐙譜紅簫帳夢游元九豔詞賦
罷誰共題蕉只許風流白傅刻燭賭深宵涼月花梢轉
猶吮吟毫縱把柔情懣後惹團香鏤雪往事多遙賸
茶煙禪榻對景轉無聊漾簾波東風庭院動新愁幾度
暗魂銷春無賴絮繁絲亂又近花朝

沁園春

針線帖

爲覓紅絲數摺繙來微留爪痕愛殘絨吐罷鏡邊安放
口香薰徧膝上橫陳粉浣時彈汗黏易潤空白輕描花

樣新停針暇戲簽名署尾小楷偏勾 玉纖按貼頻頻
奈四角研摩漸漸皺更窗前學刺小姑代檢樓頭配線
鄰女偷掀本異蘭亭碑憐沒字一笑檀郎認未真妝臺
畔羨還同繡譜長伴針神

杜文瀾

字小舫秀水人今官江蘇候補道有曼陀羅花閣詞

卜算子

殘月

花影漾簾波夜久春痕薄試問姮娥瘦幾分只有闌干
覺 陌上玉驄嘶喚起雙棲鵲楊柳梢頭挂曉星又下
西樓角

摸魚兒

菱

占蘼鄉綠瑩柔玉一繩界斷秋水瓜皮艇小穿波穩采
采溼衣空翠涼影碎聽隔浦清歌驚破鴛鴦睡堆盤更
美笑瘦削軟尖斜欹巾角閒供雪瓷醉任多刺清勝
蓮房芡米折腰情味如此靈池漫道浮根弱紅紫未黏
泥滓還故里記趁曉南湖船聚人喧市西風又起悵桂
櫓歸遲菰塘路冷夢繞碧雲裏

清平樂

春夜聽雨

小樓燈倦愁聽檐聲濺隔巷桃花紅太賤瘦盡東風誰
怨鈿車空訂歸期錦鴛暗溼香泥明日疏簾休卷春
寒燕子來稀

八聲甘州

淮陰晚渡

尙依稀認得舊沙鷗三年路重經問隄邊瘦柳春風底
事減卻流鶯十里愁蕪悽碧旗影淡孤城誰倚山陽笛
併入鵑聲空賸平橋戍角共歸潮暗咽似恨言兵墜
營門白日過客阻揚舲更休上江樓呼酒怕夜深野哭
不堪聽還飄泊任王孫老匣劍哀鳴

憶舊遊

竹抱軒消夏初集詠夕陽

正高城霽雨獨客登樓怕近黃昏暮色明千樹帶歸鴉
數點紅到柴門醉顏更教長駐天影散霞紋趁暗柳涼
蟬深簾晚燕重倒金尊征人在何處傍疏林策馬頻

問前村渺渺煙波濶
陂亂帆半葉挂上離痕舊遊記尋
湖畔荒草暖晴薰
自路隔雷峰悠悠望絕東去雲

東風第一枝

菜花

麥隴殘寒桑陰碎
雨釀成一片花意買春誰散金錢媚
晚競鋪繡綺遺鈿漫拾
俏不上玉人釵尾但滿村亂蜨
玲玕暗逐鳳韉香細
圍古寺翠煙似洗沿敗井舊愁
又起最憐小徑三叉
占了夕陽半里蘊心抽老怕悄換
鄉園滋味趁那角野店青旗獨倚
破籬閒醉

高陽臺

平山感舊

髡柳蘇青癭苔褪碧
醉翁僂魄誰招瘦了斜陽隔江山

色蕭條孤城一片霜笳起問玉人那處吹簫便遊蹤不
是重來也怕魂銷闌干況是當年倚喚泊紅深翠曾
款輕橈斷夢惺忪可憐明月今宵湖光似恨鷗鄉冷趁
東風卷起春潮更禁他殘鳩聲聲啼過紅橋

齊天樂

秦淮秋柳

江南一夜香波冷樓臺畫成秋意舊院藏鴛長橋繫馬
攀折遊蹤難記飄零燕子認六代斜陽倦魂醒未怨笛
誰家後庭歌罷更顚顚桃根桃葉易老渡頭空照影
羞鬪眉翠舞扇勾雲華燈背雨都換傷春滋味闌干傍
水問丁字簾前細腰誰倚無那西風亂鴉啼又起

潘曾瑋

字季玉吳縣人官候選道

菩薩蠻

登樓一望傷心碧
行人不見關山隔
清淚涇羅衣
忍看雙燕飛
離愁千萬縷
簾外風還雨
野水漲紅橋
怎教魂不銷

又

鄰家同戍遼陽轉
昨宵猶說瓜期緩
底事苦淹留
憶君愁復愁
香銷銀篆冷
恨也無人省
夢影不分明
月華何處清

相見歡

雪花點點中庭峭寒生卻被斜風吹起亂飄零
掃不去渾難住上簾旌比是春來飛絮更無情

浪淘沙

新晴次韻星齋兄

茗話小簾前商略新泉綠陰如水水如煙水面鴛鴦三十六
好夢都圓最是雨餘天翠溼紅鮮嫩涼只在藕花邊
可惜垂楊千萬縷不繫秋船

摸魚兒

最無聊滿城風雨秋來秋又歸去江蘼搖落蒹葭冷清
景不堪重數愁幾許又漠漠荒煙添出愁千縷蒼茫野
渡有幾箇閒鷗一灣衰柳禁得斷腸處天涯念多半

傷心日暮而今還向誰訴斜陽脈脈隨流水那管等閒
離緒空自苦空寫出青山紅葉銷魂句淒涼莫語待換
了霜容雪花點染更結歲寒侶

俞敦培

字芝恬金匱人官樂平知縣有藝雲詞

菩薩蠻

流蘇冒夢羅帷底有人扶夢慙慙起簾捲怯東風庭花
映頰紅春情加倍軟花命偏生短願得反魂丹替花
枝上安

卜算子

嫩綠密成陰殘夢圓無據曲曲闌干小小亭舊日留香

處新雨漲池塘芳草前裙路不見珊珊倩影來卻送春歸去

浪淘沙

鶯語綺窗前喚醒幽眠起來閒倚玉臺邊慢理綠雲輕
綰髻淡掃眉鉛妝罷尙遷延悄影如仙海棠紅得可
人憐手摘一枝重照鏡到底誰妍

長亭怨

送孫月坡歸里

正商略將春留住不道詞仙更隨春去順水船輕載儂
鄉夢定應許已成歸計誰信有羈人妒夕照亂鴉飛問
相趁收帆何處湓浦甚評花說劍只共月圓三度離

懷似醉便沈醉怎忘淒楚看兩岸疊嶂雲遮也都是黯
然情緒待悄囑東風重把閒鷗吹聚

慶清朝

金陵李氏女年及笄美而待字城破陷賊中女懷毒入謀鴆賊事覺問指使女曰吾爲天下人殺賊耳賊怒支解之有逸出者親見其事言之甚詳詞以弔之

無望珠還早拚玉碎豈甘燕雀同羣要憑弱質力扶浩
劫回輪想見明眸秀靨忍悲強笑暗含瞋渾不信彼蒼
似醉容得黃巾爭奈狼星未隕早罡風驟起吹墮香
雲痕留碧血更無蝶簇湘褰休訝斷腸草毒箇儂原是
斷腸人今誰向青溪溪畔憑弔芳魂

木蘭花慢

殘荷和錢小南

記芳塘乍暖趁泥潤種新蓮便逝水流光怎教容易到
了秋天闌珊待留聽雨又嫌他漏卻碎珠圓悟徹如來
世界花應惆悵滄田漪漣涼沁藕絲船瘦煞翠娟娟
任翦製爲衣伶俜墜粉西子湖邊從前戲魚縱在也驚
猜倩影淡於煙爲問西風底事等閒吹老華年

王慶勳

字叔彝上海人官浙江
候補道有詒安堂詞

少年遊

梧桐影外月波流清景十分幽衣上涼多笛邊風緊殘
夢五更頭蟾輝問有何人賞獨自倚層樓萬籟沈空
纖雲消盡冷浸一城秋

祝英臺近

松陵道中早起寄內

日將升煙未散蒼莽滿堤柳蘭桹無聲輕撥水紋皺祇
愁蓼岸涼紅菰汀濃碧把詩夢一痕圍瘦漫叉手試
看料峭新寒渾欲刺吟袖裏著重衾先喚暖芳酒還教
寄語深閨客中風露卻慣共鷺鷥銷受

蝶戀花

爲沈秋江題秋江放棹圖

萬頃涼波明似鏡蘆荻蕭蕭吹老西風影彷彿松陵湖
畔景幽懷好與沙鷗誼如此溪山堪小隱檢點琴書
攜上瓜皮艇一抹斜陽催薄暝詩襟輕浣蘋花冷

青玉案

題嚴伯雅詞稿

年年走徧天涯路，剩滿紙都離緒。道是相思誰共語，曉風殘月一程程去。吟破青山曙。買絲繡到弓衣句。且爲江南好春住。處處東風啼杜宇。吳苑鶯花吳淞煙雨。又釀愁如許。

高陽臺

陳且陶以海天味夢圖囑題悼其亡姬作也

粉鏡塵霏璇閨月，冷閒愁何處堪消。往日情根到今盡。是愁苗斜陽紅上青溪渡。記雙雙共載蘭橈。最魂銷楊柳樓頭幾度瓊簫。江城一抹渾如舊。看碧天無際又漲春潮。海樣深情千金難買。良宵虛窗寂寞誰堪語。覺簾前雲亦無聊。水迢迢指點風帆夢與俱遙。

王慶昌

字兩湘上海人
諸生官郎中

金縷曲

奉題叔彝兄詞集卽用集中次稼軒韻

詩品超東野更詞壇高張旗幟恥居噲下自有靈襟冰
雪淨漫慮向平婚嫁儘細把煙雲描畫柳七詞華秦七
體恰爲君值得稱前馬瀟灑興任舒寫西泠況許開
吟社聽歡呼當年蘇白又重來也太守風流今似昔題
徧迴廊曲榭忍孤負湖山早夜慚愧雁行甘戢影悵何
時鼓棹相隨者閒按譜共消夏

周作鎔

字陶齋烏程人官江
蘇知縣有瀟碧詞

鷓鴣天

池柳初裁細葉新夕陽紅溼畫闌春日長人困慵梳洗
一鏡芙蓉認未真珠箔捲寶爐溫濃歡斗帳怕輕分
彩蟾心事無人識西北高樓掩暮雲

祝英臺近

晚妝慵殘睡覺春淺上蛾岫錦帶移香腰怯病來瘦幾
回釵卜燈窗鵲啼月落又枝外青梅如豆步晴晝記
曾隔坐傳盃花徑共攜手別後相思桃葉尙如舊最憐
一縷東風吹愁不斷竟亂似空江煙柳

聲聲慢

乙卯秋丁巳解

是解保庵同客袁浦出示近詞感賦

嵐雲度翠鏡沼吹漪飄零詞客年年酒醒闌宵青衫有

淚偷彈梅邊似曾相識認前身白石飛僊清宵迴更數
叢涼竹搖起秋烟二十四橋明月早瓊簫淒斷夢冷
樊川鬢已成絲那堪聽到歌殘寒鴉幾番啼盡賸大隄
流水依然萍華晚對西風愁滿畫闌

繼

振字又雲滿洲人駐防乍浦官
廣東同知有五湖煙艇詞

相思令

依舊涼天如水無那是淒清禁得橫風闌雨逼著暗愁
生夢裏款語分明夢醒時枉自忪惺早知歡夢無憑
當初不合多情

品令

用周美成韻

鬢更初靜瑣窗底燈搖孤影卻道咫尺蓬山近正無聊
賴疎雨涼成陣 驀地惹將多少恨者相思誰問枉將
心跡雙雙印雨雲無定拚把魂消盡

浪淘沙

燈影閃涼宵做出無聊簾紋如水夢迢迢夢裏不知身
是夢夢也魂消 舊事記雲翹玉杵空邀閑風吹影墮
藍橋十里月明山下路鶴背風高

鋸解令

五湖船上五湖人待載去臙脂滙畔輕帆底事故遲遲
挂不起別愁一半 問誰柝彈卻把鴛鴦打散相思兩

地料難禁更遠雁一行橫斷

蝶戀花

一縷驚魂同絮弱爲底關心數盡嚴城柝莫怪雙肩真
似削峭寒重壓鴛衾薄枕上蛙聲偏閣閣惱亂情懷
又早啼鳥鵲歸路一彎纖月落要人此際知離索

鷓鴣天

瘦損腰肢減帶圍柳枝聲苦柘枝悲垂虹亭外風波惡
一挂征帆竟不歸春已去事全非無端綠暗又紅稀
絕憐花底雙飛蝶迎著東風氣力微

鞦紅

淒涼如此憐儂未慣鎖日裏迴腸九轉玉容況是者般
纖婉爭禁得病愁深淺聽說春風依然人面早悵望
歲華瑣院誰知尺地已成天遠料賸有眉痕翠斷

木蘭花慢

把闌干倚徧最無奈倦人天想翠袖單寒紅綃溼盡別
樣堪憐纏綿已拚不憶怎臨風猶把舊題牋爲問歸期
近還背人偷卜金錢徒然鏡約盼重圓香夢欲成煙
早畫屏低掩無心重理鈿雀金蟬濺濺莫拋淚點向枝
頭恐誤了啼鵲且把東風暗祝斷腸休似今年

王安瀾

字小猷
仁和人

玉女迎春慢

琴鵬招集湘靈館看雪梅

鎮日尋春芒屨破，蹋徧嶺頭雲午。昔夢湘江浦，淑一桁
夕陽煙，泣花濃雪聚。舞玉蜨，潛虬飛去，醒何處也。渾是
今朝紅萼千縷。開簾正值黃昏，苔痕暈月，雲容堆絮。
記否彈琴小暇，獨自攜鉏，薄暮間花無語。花發了，春風
無主要，識天心，此是陽春來路。

沈起潤

字綠舫
錢塘人

賀新涼

訪琴鵬留宿庵中次早和閒泉作

清晝疎簾挂，最好是茶煙，禪榻攤書。消夏人在碧雲深
處，坐遮滿桐陰。一架早不受點塵，牽惹如此山齋真絕。

俗笑栖遲何必衡門下已不讓蓬瀛也 隔江煙景渾
如畫更滿眼睛嵐活潑竹風瀟灑我喜登臨偕馬遠樽
酒昨宵同把倒三峽詞源傾瀉曉起小檀欒室裏讀諸
君詩句騷而雅有儂是知音者

余

鶚字慈柏
錢塘人

月邊嬌

茉莉枕

春逼芙蓉又簾展涼生簾疎風拂水精新薦瑤英滿貯
偏是夜深香溢通中製巧看四面藤編還密相思慣惹
恰點點芳心頻洩 那時浴罷拈來綵絲穿露玉壺團
雪綠鬟重整紅氍毹並倚翻羨孤眠清絕橫陳任意只化

蝶詩魂幽結惺忪夢醒照一牀明月

陳詠

字寄生
仁和人

摸魚兒

題高茶庵姝倩空江弔影圖圖爲余姝子
淑殉難錢江作

望錢塘煙荒草蔓磷磷白骨無數瀾漫風雪空江裏翠
羽明璫何處魂夢阻況尙是連天烽火迷歸路飄零似
羽向寒食清明一杯遙酌幾度淚如雨滄桑恨我亦
行藏頻誤而今差幸團聚桃源風景依然好惟有茗香
誰賦春又暮聽杜宇聲聲啼出相思苦離愁萬縷便吟
罷哀蟬珊珊來也忍把斷腸訴

孫兆善

字蘭居丹徒人
有讀雪堂稿

摸魚兒

耶溪漁隱題詞

問蒼茫五湖煙水扁舟何處堪繫季鷹忽作尊鱸思一
棹飄然歸矣奩乍啟任葉底纖鱗來往爭相戲浮沈身
世有數點閒鷗兩行浴鷺相伴水雲裏斜陽外回首
當年遺事鷗夷今日存未殘香斷粉都消盡空剩一蓑
天際休便已會掣海長鯨指日投竿起中流鼓枻且俯
吸湖光仰吞山影領略閒中味

丁翼

字雲龕無錫人由軍功官福建
撫標中軍叅將有浣花山莊詞

采桑子

夢花寄儂

秋來水國蕭疎甚開瘦芙蓉白徧蘆叢蟬火明邊一穗

紅搖搖幾點嬌無那雁語纔終鷗夢方濃欲采先愁
路不通

金縷曲

題鍾寶田拈花一笑圖

綺債償難了正當前紅嫣紫姹蜂酣蝶飽秋菊春蘭剛
競秀更有羣芳環繞儔不願是鄉堪老誰解浮生同夢
幻聽鐘聲一杵回頭早塵世障任紛擾襟期瀟灑年
方少羨英英筆搖五岳詞源峽倒無那雄心何所寄暫
寄美人芳草況到處燕鶯聲巧不待當頭煩棒喝悄不
禁莞爾拈花笑叅妙諦向三寶

浪淘沙

誰剪舊宮衣春思迷離南朝金粉未全非愁絕玉勾斜
外路綠怨紅悽紫陌畫樓西拾翠人稀金鈿委地茜
裙低二十四橋歌舞歇祇剩香肥

摸魚兒

見將離不勝惆悵離懷何限誰語東風不管離人恨只
送好春歸去思寄與又一院荼蘼夢醒傷遲暮蜂悽蝶
楚便歌板臨風畫船載酒無復舊情緒凝眸處多少
荒煙斷礎簫聲休問何許繁華今日消磨盡說甚月明
終古君記取算只有黃梅時節家家雨詩龍酒虎奈塵
鬢飛霜吟髭染雪餘勇不堪賈

沁園春

題春江醉月圖

三月煙花半壁江山淒然倦游正荒荒浩劫魂銷海角
迢迢故國人唱刀頭舞劍心雄吹簫淚下都付春潮日
夜流停尊望祇青天萬里白鳥沈浮何人弄笛扁舟
訝白紵春衫冷欲秋便釣鼇東溟名輕射虎舉杯南斗
醉狎翻鷗黃鶴歸與青蓮往矣誰問江干舊酒樓傷心
處是中原蠻觸夢繞梁州

國朝詞綜補卷五十